

TE HEHEURAA API

I neia i te piha neneiraa a Henere, i Roto Miti i Utah, no te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaïete, i te mau avae atoa. Te hoo, e piti farane i te matahiti hoe.

Nu. 2

Febuare, 1914

Mat. 9

“Aore ra, eaha ihora te feia i bapetizohia no te feia i pohe ra, ia ore roa te feia i pohe ra, ia tia faahou? eaha ihora ratou i bapetizohia i no tei pohe ra.”

—I Korinetia 15:29.

TE ORA NO TE FEIA I POHE RA.

(Tuatiraa)

E teie nei e parau rii tatou no te Varua o te taata. Ia fâ maira Iesu i ta'na pipi i muri a'e i to'na tiafaahouraa, mata'u atura ratou, parau a'era e varua ta ratou i hi'o ra.

Ua haapapu râ Iesu i to ratou mau mana'o i nia i te reira vahi, e ua na ò atura oia ia ratou: “A hi'o mai na i tau rima e tau avae o vau mau â, a fafa mai na ia ite; aita o te varua e i'o e te ivi mai to'u nei, ta outou e hi'o mai nei.” Ua faaite Iesu ia ratou e ia tatou atoa i roto i taua parau ra e, e tino tahuti ore e e varua atoa hoi to'na i reira. Aita o te varua e i'o e te ivi mai ta to te tino tahuti ore; e aita to te tino tahuti ore e i'o e te toto mai ta to te tino tahuti te huru. Te varua o te taata e mea ite ia, o tei vai ra hou to'na taeraa mai i teie nei ao, e e vai noa teie varua i muri i te poheraa no te ino nei. Ia pohe te tino nei e tia i te varua e

haere i tera vahi e tera vahi mai te au i te mau ture tei vai i te reira vahi. Te mau mea ite atoa e mau mea tahuti ore ia. Te hoê mea ite, ma te tino ore e varua ia. E varua ma te tino tahuti, e taata ia. Te vai atura i na varua e piti, te mau varua o tei roaa ia ratou te tino tahuti ore, oia hoi te mau varua tei oti ia ratou te tia-faahouraa; e te mau varua tei parahi i te ao varua, oia hoi i te vahi e farii i to tatou mau varua ia pohe roa to tatou mau tino nei. E vahi faaineineraa te reira no te mau varua tei ore i faaroo i te haapiiraa o te evanelia i roto i teie nei ao. Ua patoihia râ teie parau mau e te mau haapaoraa e rave rahi. Te faaroo nei ratou e, ia pohe te taata tatarahapa e haere oioi to'na varua i te basileia o te Atua. E ia faatia i ta ratou parau te taio nei ratou i te mau parau na Iesu i te taata êia tei faasataurohia i pihai iho ia'na. Teie ta Iesu parau: "E paradoiso ia oe e o vau atoa i teie nei â mahana, oia mau ta'u e parau atu ia oe nei." Te pae rahi o te mau Cherisitiano e faaroo e, ia pohe roa taua taata êia ra, haere atura oia i taua ihora mahana ma te oaoa rahi i mua i te aro o te Atua. E teie nei e haapii tatou i te parau na te Atua ia ite e, e parau mau anei te reira mana'o e aore anei.

I muri a'era ta Iesu parauraa'tu i taua taata êia ra, pohe roa ihora oia, e ua tuuhia to'na tino i roto i te menema. E toru mahana i muri a'e te faasatauroraahia no Iesu, haere atura Maria i te menema e ite atura e, ua ere to te menema i te tino no Iesu, e ua oto ihora oia. Ua ite Iesu ia Maria, e ua na ô maira oia ia'na, "E, tera ra vahine, eaha oe i oto ai? O vai ta oe e imi na?" Mana'o ihora Maria e, o te taata faaapu oia, e ua na ô atura ia'na, "E hoa na oe i hopoi ê ra, e faaite mai oe i te vai ihoraahia oia e oe na, e na'u e tii atu e hopoi ê." Ua parau maira Iesu ia'na, "E Maria." Ua fariu atura oia ua parau atura ia'na, "E Raboni," (o tei parauhia ra e, E te Fatu). Ua parau maira Iesu ia'na, "Eiaha e tatea mai ia'u, aore â vau i tae i nia i

tau Metua ra: e haere râ oe i tau mau taeae ra, e parau atu ia ratou e, Te haere nei au i tau Metua ra e to outou Metua ra, e i tau Atua ra e to outou Atua ra.” (Ioane 20: 14-17).

Te faaite papu roa nei Iesu i roto i teie nei mau parau e, aita to’na varua i haere i te basileia o te Atua i roto i te taima ta to’na tino i vai i roto i te menema, e no reira, te ite papu nei tatou e, aita te varua o taua taata êia ra i haere i te basileia o te Atua i te mahana ta’na i pohe ai. Te mana’o e, ua faaorahia te varua o taua taata haru ra i te basileia o te Atua i te mahana iho ta’na i pohe, i patoihia i te mau parau no te Faufaa Apî.

No te mea, parau maira Iesu e, “e i paradaiso ia oe e o vau atoa i teie nei â mahana,” e i toru mahana i muri a’era, ua na ô maira oia ia Maria, “Eiaha e tapea mai ia’u; aore â vau i tae i nia i tau Metua,” teie nei, te tupu nei teie uiraa, Teihea to’na varua i roto i te taima ta to’na tino i vai i roto i te menema? Ia roaa ia tatou te pahonoraa tia i taua uiraa nei, e roaa’toa ia tatou te ite no te vairaa no te varua o taua taata êia ra i roto i te reira taima, no te mea hoê â huru te vairaa o te na varua o Iesus raua o taua taata êia ra.

Tei Petero hoê 3:18, 19, 20, te pahonoraa i to tatou uiraa. Ua na ô atura Petero: “I pohe na hoi te Mesia iho no te hara hoê poheraa, te taata parau-tia no te feia parau-tia ore, ia tae tatou ia’na i te Atua ra, i taparahi pohe mau hia oia i te tino ra i faaorahia râ e te varua: o ta’na ia i a’o atu i te mau varua e vai nei i roto i te tapearaa i teie nei o tei ore i faaroo i mutaa ihora i te faaoromairaa roa o te Atua a tia i te anotau ia Noa ra, i te tarairaa i te pahi ra, i ora’i e toofanu pue taata i te moana, oia hoi na taata too-vau ra.”

Te haapii mai nei teie nei mau parau ia tatou e, ua haere Iesu i te tapearaa, oia hoi i te ao varua i roto i te taima ta to’na tino i vai i roto i te menema, e ua a’o atura

oia i reira i ta'na evanehia i te mau varua tei ore i faaroo i te reira i ta ratou parahi raa i teie nei ao.

E teie nei na ite tatou e, o paradaiso o te hoê vahi faaineineraa ia no te mau varua tei ore i faaroo e farii hoi i te evanelia i roto i teie nei ao. Ua na ô atura Isaia no te mau varua i roto i taua tapearaa ra: "E haaputuhia mai ratou atoa ra, mai te feia i tapeahia i roto i te apoo ra, e ia opanihuahia ratou i roto i taua tapearaa ra, e ia hope na mahana e rave rahi e tihia mai ai ratou." Teie te Iehova parau i nia i te reira vahi: O vau o Iehova tei tii ia oe ei rave i te parau tia: e na'u e mau i te rima e e tia i hoi ia oe; e horoa hoi au ia oe ei faufaa na te mau taata, e ei tiarama e haamaramarama i te mau fenua: ei faaaraara i te mata o te matapo; ia tuua mai te titi i tapeahia ra, e te fare tapearaa ra." (Isaia 42:6-7). E teie te tahi parau na'na: "Tei nia ia'u te varua o te Fatu ra o Iehova, no te mea, ua faatahinu mai Iehova ia'u; ua tono mai oia ia'u ei faaite i te parau oaoa i te mau aa mârû ra, ei faaora hoi i te feia aa oto; ia faaite i te titi: e ia matara roa te feia tapeahia ra." (Isaia 61:1).

Ua au maitai roa teie mau parau i te mau parau na Petero. Ua tapeahia ratou a piti tausini matahiti no ta ratou farii ore i te evanelia e te parau faaite no Noa. Ua roaa ia ratou te utua ta Iesu i haapii ia parau oia e; "E parau mau ta'u e parau atu ia oe na, E ore roa oe e tuua mai e ia hoo na roa ia oe te koderani iti hopea." (Mataio 5:26) e "E te tavini i ite i te hinaaro o to'na ra fatu, e aita i faaineine ia'na iho, aore hoi i rave i ta te fatu hinaaro ra, e papaihia ia e rave rahi te tairiraa." (Luka 12:47). Aue te oaoa rahi o te mau varua tei parahi i paradaiso ia haere te Faaora i reira ma te haapii atu ia ratou i roto te tapearaa, mai te mea e ferii ratou i te reira.

E teie nei i tia ia tatou i haroaroa i teie mei mau parau na Iesu: "Amene, amene, e parau atu vau ia outou, Ua fatata i teie nei â te hora e faaroo ai tei pohe i te re'o o te

Tamaiti a te Atua, e te faaroo ra, e ora ia.” E teie mau parau hoi na Petero: “I parau atoa hia’tu ai hoi te evanelia i te feia i pohe ra i faahapahia’tu ai ratou e te taata i te tino ra, te ora ra râ ratou i te Atua i te varua ra.” Mai te mea i roaa i te mau varua o te mau taata, tei ore i farii i te evanelia i te tau Noa, te ravea no te ora i te ao varua, (e ua na reira ratou) e mea maitai rahi atu e roaa i te mau taata tei ore i faaroo i te haapiiraa o te evanelia i teie nei ao te ravea no te ora i te ao varua. Ia faaroo te mau taata atoa i te evanelia e tia’i; i teie nei ao, e aore râ i te ao varua, ia fa’i te mau vaha atoa, e o Iesu Mesia te Fatu, e hanahana’tu te Atua Metua ra.

Mai te mea e haroaroa tatou i teie nei mau mea e ite ai tatou i te haapaoraa tia o te Atua, e e tano te ravea no te ora. E faateiteihia te mau tamarii atoa na Adamu, maori râ o te mau tamaiti o te pohe ra, i te hoê vahi i roto i te basileia o te Atua e au ai i ta ratou haapaoraa i te hinaaro o te Atua ta ratou i faaroo ra.

E haavahia tatou e tia’i i te ture o te evanelia e no reira e tia ia tatou e faaroo i te reira hou to tatou haavaraa; ia ore te taata e faaroo i te ture, e ore roa oia e haavahia i te reira. Te mau taata atoa o te tae i te basileia o te Atua e tomo i te uputa e tia’i. Ua faite Iesu i te uputa e au ia haerehia e tatou i roto i ta’na mau parau ia Nidodemo.: “Amene, amene e parau atu vau ia oe, Ia ore te taata ia fanau i te pape e te Varua, e ore oia e ô i te basileia o te Atua ra (Ioane 3: 3-5) E teie nei e faaroo tatou i teie uiraa: “E ravea anei to te mau taata tei farii i te evanelia i te ao varua e roaa te fanauraa o te pape? Teie ta matou pahonoraa E! Na roto i te aroha rahi o te Atua, e vai nei te ravea e roaa ia ratou te fanauraa o te pape. E teie te ravea:

E Babetizohia te Feia ora no te Feia i Pohe.

Ua itehia teie ravea e te mau aposetolo no te mea, ua na ô atura Paulo: Aore ra, eaha ihora te feia babetizohia no

te feia i pohe ra, ia ore roa te feia i pohe ra ia tia faahou? eaha ihora ratou i babetizohia no tei pohe ra? (1 Korine-tia 15:29).

Na roto i teie nei ravea e iritihia te mau opani no te tapearaa(e e faaineinehia te mau varua tei parahi i reira no to ratou tomoraa i roto i te basileia o te Atua. E tia i te mau taata i te pae tino nei e rave i te hoê ohipa rahi e te faufaa no te ratou fetii pohe no roto i teie oroa mo'a e te nehenehe o te evanelia. E riro tatou i reira ei mau faaora i nia i te mou'a ra i Ziona. E teie nei e mea papu teie tohu no Malika te peropheta: "Inaha, e tonono na vau i te peropheta ra ia Elia ia outou na, a tae atu ai i taua mahana rahi mata'u o Iehova ra: ia faafariu oia i te aau o te mau metua i te tamarii, e te aau o te tamarii i to ratou mau metua o te haere mai hoi au, e o te tairi i te fenua i te ino." (Malika 4: 5, 6). Ua tupu mau teie tohu no te mea ua fâ maira Elia ia Iosepha Semita raua o Olive Tautere i roto i te Hiero i te oire ra o Kirtland i te 8 no Eperera i te 1836, e ua horoa oia ia raua i te mau taviri ia faafariu i te mau aau o te mau metua i ta ratou mau tamarii, e te mau aau o te mau tamarii i to ratou mau metua. E mai te reira mahana e tae roa mai i teie nei ua haapao te Feia Mo'a i te mau Mahana Hopea nei i te reira huru babetizoraa, e e itoito ratou i te hamaniraa i te mau heiro, no te mea ua haapaohia te mau hiero no te reira huru ohipa.

Tei Mika 4:1, 2, teie mau parau: "E riro ia tae i te mau mahana hopea ra, e faatiahia'i, te mou'a ra o te fare o Iehova i nia i te tupuai mou'a, e faateiteihia ia i nia i te mau aivi; e tairuru atoa mai te mau etene (taata) i reira. E rave rahi te fenua e haere, a parau ai e, E haere mai, e haere tatou i nia i te mou'a o Iehova, i te hiero o te Atua o Iakoba; e na'na e haapii mai ia tatou i ta'na haapaoraa, e haere tatou na te e'a ta'na e faaite maira, na Ziona'tu hoi te

ture i te revaraa'tu, e te parau a Iehova, i na Ierusalema'tu ia.'"

I teie nei anotau te tairuru noa nei te feia parau-tia no te mau fenua atoa mai i te mou'a ra o te fare o Iehova e te rave nei ratou i reira i te ohipa no to ratou mau fetii i pohe tei parahi i teie nei ao i te mau tau i haapii ore hia te evanelia a Iesu.

E ia pohe te mau tavini o te Atua tei farii i te evanelia e te autahu'araa mo'a i teie nei ao, e haere ratou i te ao varua e a'o atu i reira i te evanelia a te Tamaiti a te taata mai ta Iesu i a'o atu i roto i te taime ta to'na tino i vai i roto i te menema. E e na reirahia'i e tae roa i te taime a faaroo-hia te evanelia e te mau tamarii atoa na Adamu, te feia ora e te feia i pohe, ia faahapahia'tu ai ratou e te taata i te tino ra, te ora râ ratou i te Atua i te varua ra. Ua moe te ravea o te ora i te hoê huru taata ana'e, oia hoi i te mau tamaiti o te pohe ra. E feia ite ore to te mau haapaoraa Cherisitiano no teie mau mea nei, no te mea, ua huna ratou i te mana o te Varua Maitai, e e ore roa e tia i te taata e haroa-roa i te mau mea a te Atua, maori râ e uruhia ratou e te reira varua.

Ua huna'toa ratou i te heheuraa parau, e e vahava-ha'tu te tahi pae o ratou i te mau tavini haehaa a te Atua, e no reira te vai noa ra ratou i te poiri i te mau mea no te ora. E e tapeahia to ratou mau varua i roto i te tapearaa mai ta to te mau taata tei ore i farii i te evanelia i te tau no Noa, e e parahi ratou i reira ia hoo ra ia ratou te Koderani iti hopea. E roaa ia ratou te utua e au i ta ratou mau ohipa. Ua ite te mau taata tei haamaramamahia e te Varua Maitai e, ua hau te ravea Faaora i te Feia i Pohera, i te maitai, e te hanahana, e te aroha e te tia, i te mau ravea êê atoa ra.

Ua faaite-papu-hia te aroha e te paari e te faaoromai-pau ore o te Atua i roto i tana ravea nei. E mea faufaa rahi roa te ravea i haapaohia no te Faaoraraa i te Feia i Pohe ra

ta te Atua i heheu mai i teie nei anotau, e e tapao te reira no te taeraa mai no te mau mahana hopea nei (A hi'o i te Mika 4:12).

Te ani atu nei matou i te mau taata atoa e ferurui i teie nei mau parau rahi mau ma te aau haehaa e te faaroo. E ani i te Atua e na'na e haamaramarama ia outou, "Inaha, e ati hoi te fenua i te pouri, e te mau etene (taata) i te pouri taotao." (Isaia 60: 2). Te ora nei tatou i te tau ta te Atua e faaineine i te hoê feia no te taeraa mai no te Mesia, oia hoi i te Tuuraa parau i te hoperaa mau o te mau tau ra, e te amui noa nei te Atua i te mau mea atoa i te Mesia.

E hoa ino ma e, e ere teie mau haapiiraa e mea apî, maori râ i to te ao nei i teie nei anotau. Ua haapiihia te reira e te mau aposetolo na Iesu e te Feia Mo'a i te tau tahito. Teie ohipa aroha, oia hoi te Faaoraraa i te Feia i Pohe ra i heheuhia i te Peropheta ra o Iosepha Semita e te Fatu i teie nei mau mahana hopea nei. E e haapaohia teie huru ohipa i roto i te mau vahi mo'a ana'e, e no reira te hamani nei te Feia Mo'a i te mau Mahana Hopea nei i te mau Hiero ia haapao ratou i teie ohipa no to ratou Pohe.

Ua hamani ratou i na Hiero a ono na rato i te faaue mo'a. Te hiero matamua ta ratou i hamani i haamatahia i te 23 no Tiurai i te 1833 i te oire ra o Kirtland, e i tomohia i te 27 no Mati i te 1836. Tei roto i teie hiero ta Elia i fâ maira ia Iosepha Semita raua o Olive Tautere e i horoa ia raua i te mau taviri no te Faaoraraa i te Feia i Pohe. Te hiero piti i haamatahia i te 6 no Eperera i te 1841 i te oire ra o Navoo e i tomohia i te 30 no Eperera i te 1846. Te hiero toru i haamatahia i te 10 no Mati i te 1873 i te oire ra o Saint George e i tomohia i te 1 no Tenuare i te 1877. Ua haamatahia te hiero maha i te 17 no Setepa i te 1877 i te oire ra o Logan e i tomohia i te 17 no Me i te 1884. Te hiero pae i haamatahia i te 14 no Eperera i te 1879 i te oire ra o Manti e i tomohia i te 21 no Me i te 1888. Tei Roto Miti,

Utah, te Hiero ono. Ua haamatahia te reira i te 6 no Eperera i te 1863 e i tomohia i te 6 no Eperera i te 1893. A vau ahuru ma hitu tauatini taata i tae maira i te tomoraa no teie Hiero i Roto Miti, e a iva milioni tara te rahi o to'na faufaa. Te hamani nei te Feia Mo'a i teie nei i te tahi hiero apî i Canada e e tamau â ratou i te patu i e mau hiero i tera vahi e i tera vahi e tia'i i te Feia Mo'a e rave i te ohipa no to ratou fetii i pohe ra.

E horoahia i teie nei parau i roto i te re'o Farani i te mau taata e ani mai.

—o—



E hooho'a teie no te auhune i Belegiama i teie nei mahiti, tei roto i taua aua te mau taata auhune e te mau faehau atoa.

—o—

TE MAU PARAU API.

—o—

I te 29 no Tenuare.

Ua vî pinepine te mau nuu o te Purutia i teie nei mau mahana e te otemu noa nei ratou i muri. Ua tauturuhia te mau nuu o te Farani e te Beretane e te tahi mau nuu apî mai Baretane mai. Ia paruru te Purutia i to ratou haereraa i muri te faaineine nei ratou i te tahi mau pari ei parahiraa no te mau nuu i turai hia i muri e te Farani e te Baretane.

—o—

I te 30 no Tenuare.

Ua maue atu te tahi mau pahi reva o te Baretane e tae atu i Belegiama e ua faatopa te tahi mau topito i nia i te tahi mau haaputupuraa puhapa o te Purutia i Zeeburgge e i te oire Ostend. Ua na reira atoa te tahi mau pahi reva Farani i te faatopa i te tahi mau topita i nia i te tahi mau vahi haaputuputuraa o te Purutia i Loan e Lafere e Soissons. Ua tamata puai roa te Purutia i te tae atu ai i te pae apotoa o te anavai ra i Soissons, aita roa râ ratou i manuïa no te mea e mea puai te potoi o te Farani.

—o—

I te 8 no Febuare.

Ia ore te pahi rahi Baretane horopatete o Lusitania e haruhia e aore râ i haapeapeahia e te mau pahi Purutia, ua huti oia te reva Amarika i nia a haafatata oia i Baretane.

I te 10 no Febuare.

Te faaite mai nei te hoê parau mai Petrograde, oia hoi te oire rahi i Rusia e, e ua tupu te hoê aroraa ino hau ê; te mau nuu o te Purutia i te tahi pae e te mau nuu o te Rutia i te tahi pae. Te faaite mai nei taua parau ra e, ua pohe roa e 10,000 faehau Purutia. Ua parahi te nuu Rutia i nia iho i te hoê aivi e ua tamata te Purutia e roaa i taua aivi ra e e 22 taime ta ratou i tamata i te pauma i nia i taua aivi ra e aita â i manuia. Ua faatano te Rutia i to ratou mau pupuhi rarahi i nia ia ratou e ua taparahihia ratou mai te huru e mau manu ratou. No te ri'ari'a aita i nehenehe ia parau. E ono mahana te macro o taua aroraa e i te hopea ua vî te Purutia e ua ravetâtihia e 69 feia toroa faehau e e 5,200 faehau noa, e e 18 pupuhi matini.

—o—

I te 10 no Febuare nei ua roohia te mau motu Manua i ò Samoa ma i te hoê ati rahi. I taua mahana ra ua tupu te hoê puahi'ohi'o e te miti rahi roa e ua mou roa te mau oire i taua mau motu ra e aita hoi te hoê fare i toe mai. Ua iriti-tumu-hia te pae rahi o te mau tumu haari e te mau tumu i toe mai i faaino roa hia ia. E toru noa iho taata i pohe roa e raverahi râ tei haaparuparuhia. E mau fenua aihuarau teie mau fenua i roohia i te ati no te Hau Amarika e na taua hau ra i tono atu i te hoê manuâ e faauta'tu i te maa e te mau tauturu i te feia i roohia i te peapea. I te taime mau

no te ati e 27:50 te tai'oraa no te barameta. Ua au taua ati ra i te ati i tae mai i nia i Tahiti ma i te matahiti 1906.

—o—

1 te 16 no Febuare ua pohe te hoê taata i Tarafornia mai tera te huru o tona poheraa. El taime maoro i teie nei ua roohia ona i te hoê mai i te vairaa maa e ia amu oia i te maa e mama'i rahi roa ta'na. Ua faaroo oia e ua ora mai te tahi mau taata i te reira huru ma'i na roto i te haapaeraa i te maa. Ua tamata oia i te reira ravea e ua haapae roa oia i te maa i e 59 mahana e ua mana'o oia ua ora roa ta'na ma'i. I te 60 mahana o to'na haapaeraa i te maa ua haamata oia i te inu rii i te tahi pape anani i te tera hora e i tera hora e i taua ihora mahana pohe roa ihora oia.

—o—

Tera mai te parau api huru ê roa no Tarafonia mai. I te 30 no Tenuare ua taoto te hoê taata ruau, e 80 to'na matahiti, i nia iho i to'na roi. A taoto ai oia ra ua mana'o ihora oia te tapu ra oia i te vahie, tia inia ihora oia e haere atura i rapae i te fare e ua rave oia i te opahi tapu ê atu i tona rima au'i ma te mana'o e e vahie te reira.

A iteahia oia i te mahora i muri i to'na fare ua fatata oia i te pohe e i te hopea ua pohe roa oia.

Toae a Maere, Faaau Parau,
Rue Dumont d'Urville, Orovini, Papeete, Tahiti.

Frank J. Fullmer, Imprimeur,
2532 Seventh East Street, Salt Lake City, Utah, U. S. A.